



## ITA HALA’O MAROMAK NIA MISAUN


Iha fulan agustu, ita sei selebra tinan 200 husi Dom Bosco nia moris. Atu selebrasaun ida ne’e la sai de’it festa ida ne’ebé la troka ita-nia moris ka, liu tiha, husik ita kole de’it, ita presiza haree Joanzinho ninia esperiênsia hodi banati tuir nia. Husi momentu ne’ebé João Bosco moris, Maromak iha ona projeto/misaun ida ba nia no, maski ki’ik, João haka’as an nafatin, tuir ninia kapasidade, atu hala’o buat ne’ebé Maromak hein husi nia. Iha fulan rua ne’e, ita mós sei haka’as an atu komprende oinsá ita bele kolabora ho Maromak nia misaun, hodi hala’o tuir ida-idak nia tinan no talentu sira.

### IKONE

Domingu kalan ida iha fulan outubru 1844, molok Dom Bosco komunika ba foin-sa’e sira katak oratório sei hala’o iha Valdocco, Dom Bosco iha mehi ida ne’ebé parese kontinua ninia mehi tinan 9 nian. Nia haktuir nune’e:

Ha’u mehi katak ha’u hamutuk ho asu fuik sira, bibi-malae, bibi-oan no bibi-timur sira, asu no manu sira; sira hamutuk halo tarutu boot to’o hata’uk ema sira ne’ebé aten-barani. Ha’u hakarak halai, maibé mosu Senhora ida, ne’ebé hatais hanesan bibi-atan feto ida, no Nia dehan mai ha’u atu ba oin hodi akompaña balada sira ne’e; Nia rasik la’o iha oin. Ami la’o lemo rai, hodi para iha fatin 3. Iha parajen ida-idak balada ruma nakfilak ba bibi-oan sira hodi aumenta numeru bibi-oan sira nian. Depois de la’o kle’ur, ami hetan fatin ho du’ut kapas, iha ne’ebé balada sira bele halimar no haksoit hodi la haloaat ba malu.

Tanba ha’u kole liu, ha’u hakarak tuur no deskansa iha dalan ida, maibé Bibi-atan feto ne’e konvida ha’u atu ba oin. La’o tiha uitoan tan, ha’u to’o patio luan ida, ho veranda ne’ebé haleu patio no iha sorin iha uma kreda ida. Iha ne’ebá ha’u konxiente katak balada 4/5 sira sai ona bibi-oan sira. Sira sai barak liu no mós mosu bibi-atan balun atu tau matan ba sira. Maibé bibi-atan sira ne’e, hela la kle’ur, hafoin sira halai. Nune’e mosu buat furak ida: bibi-oan barak nakfilak ba bibi-atan sira no, hodi sai boot, sira tau matan ba bibi sira seluk. Tanba bibi atan sira sai barak liu, sira haketak malu hodi ba fatin seluk no halibur balada sira eh lori sira ba bibi-luhan.



### Pergunta atu halo oratorianu sira reflete:

- ⇒ Iha ninia mehi, Dom Bosco hasoru Senhora ida no nia fiar ba Senhora ida ne’e; iha ha’u-nia moris, ha’u bele has-oru se ne’ebé bele tulun ha’u atu komprende ha’u-nia an rasik no ha’u nia moris? Ha’u konfia ba ema sira ne’e?
- ⇒ Ha’u iha kapasidade/talentu ruma (ha’u koko atu halo lista)? Ho kapasidade sira ne’e oinsá ha’u bele fó ha’u-nia kontribuisaun iha oratório?
- ⇒ Ha’u bele halo saida atu prepara ha’u-nia an rasik atu, aban bairua, ha’u mós bele sai “bibi-atan” ba labarik no foin-sa’e sira seluk?



### JOGU

Jogu ida ne’e hakarak tulun oratorianu sira atu komprende katak Maromak hanoin ba ita ida-idak hodi entrega “misaun” ida; bainhira ita hala’o knaar ida ne’e ita bele hetan ksolok, no mós ita bele fó ksolok ba maluk sira.

Preparasaun: prepara billete sira iha ne’ebé hakerek knaar ida ne’ebé tenke kumpri (ez: lori bee kupu ida; lori korente ida, halo dezena ida...). Fahe oratorianu sira ba grupu (bele 15 iha grupu ida). Grupu ida-idak sei simu billete ida ba sira-nia membru ida-idak.

Tanba karik susar atu prepara billete ho knaar barak la hanesan, bele hanoin ba knaar 15 ne'ebé grupu hotu sei simu.



Fó minutu 15 atu ororianu sira bele halo buat ne'ebé hakerek iha billete ne'ebé sira hili. Grupu ne'ebé halo buat hotu loos no lalais liu sei manán.

## SELEBRASAUN

Prepara basia ida (ka sipu boot ida) ho bee no tau iha oin, besik kruz no simbolu seluk Batizmu nian (mina, lilin, hatais mutin ka hena mutin rohan ruma)

G: Fulan ida ne'e ita agradese Na'i ba prezente moris Dom Bosco nian ne'ebé Nia haraik ba Kreda, ba Institutu, ba mundu tomak no ba ita-nia rai. Nia moris iha loron 16 agustu 1815 no hodi celebra nia moris ita hakarak agradese ba buat hotu ne'ebé ita simu liuhusi nia moris no ita sei harohan atu ita bele hala'o misaun ne'ebé Maromak prepara ona ba ita ida-idak.

Kantu entrada nian: ....

G: Husi ki'ik kendas, João Bosco iha mehi ida: soi nia maluk sira! Nia halo buat oinoin atu bele dada sira no halo sira koñese Jezús no Maria. Nia la sura ninia tinan, nia la sees misaun ida ne'e, konxiente katak ho Batizmu nia sai ema ne'ebé haklaken Jezús nia evanjellu. Se ita kompara ita-nia moris ho ninia, iha buat barak ne'ebé la hanesan: ita ladún brani atu tuir Jezús nafatin, ita buka, uluknanain, ita-nia interesse... tan ne'e, ita hahú ita-nia selebrasaun hodi husu perdaun. Ba invokasaun ida-idak, ne'ebé bele hato'o ho espontaneu, ita hananu Na'i sadia ami.

I: Na'i, iha ha'u-nia moris ha'u ladún fó tempu ba Ita

2: Na'i, dala barak ha'u la fier katak Ita prezente iha ha'u-nia moris

....

G: Profeta barak nia ersperiénsia hatudu katak Maromak hanoin no hili sira, bainhira sira iha sira-nia inan nia knotak. Maski ita la'ós profeta, maibé Maromak hili ita no iha mehi ba ita ida-idak. Ita rona profeta Isaias nia esperiénsia:

L: Is 49,1-5

G: ho Baptizmu, ita mós tama iha Maromak nia família no ita partisipa ba Jezús nia misaun. Iha momentu ida ne'e ita hakarak hafoun fali promesa ne'ebé ita nia aman-inan sira halo bainhira ita simu Baptizmu, no repete jestu sira ne'ebé amlulik halo bainhira ita sei ki'ik.

L: Bee, hamutuk ho Espíritu Santu, haraik moris foun mai ita: moris nu'udar Maromak nia oan. Hanesan bee purifika, hamoos buat ne'ebé foer, nune'e bee Batizmu nian kasu ema nia salan, halo sira-nia laran sai moos no santu, nune'e Espíritu Santu bele horik iha sira.

Ororianu sira hakbesik ba bee no habokon tiha sira nia liman, sira sei halo sinál da kruz. (bele hananu refraun ida)

L: Mina santo konsagra amo Bispo sira no reprezenta Espíritu Santu nia prezente; mina sai sinál kbiit nian ne'ebé Maromak haraik mai ita atu hametin ita-nia fier, atu proteje itahusi buat atu hotu no tulun ita atu moris tuir Nia ho aten-barani

Ororianu sira hakbesik ba animadór ne'ebé sei halo sinál da kruz ho mina iha sira-nia rei-toos. (bele hananu refraun ida)

L: Oras ne'e ita sei sunu lilin ida, nu'udar sinál Roman nian ne'ebé mai husi Kristu Moris hi'as; hodi pasa ba malu lilin ida ne'e, ita espresa ita-nia hakaran atu sai romani iha ita-nia sosiedade no iha fatin iha ne'ebé ita hela ba. Bainhira ita sei ki'ik, ita-nia aman-inan sira tau matan ba ita-nia fier, maibé oras ne'e, ita rasik tenke haka'as an atu haboot ita-nia fier.

Ororianu ida sei sunu lilin hafoin sei pasa ba kolega sira seluk. (bele hananu refraun ida)

L: Hena mutin mak simbolu ema foun nian: ho Batizmu Maromak kria fali ita hanesan ema foun ne'ebé la iha salan, no konvida ita atu hatais Ninia moris, moris Kristu nian.

Ororianu ida hakbesik fatin iha ne'ebé iha hena mutin no foti rohan ida (bele hananu refraun ida)

G: Na'i konfia iha ita, nia hili ita, maski ki'ik no kiak, atu sai Ninia kolaboradór sira iha fatin iha ne'ebé ita hela. Maski ita iha frakeza barak, Maromak saran ninia misaun iha ita-nia liman no Nia hein katak, hanesan joão Bosco, ita hatene uza ita-nia matenek no kapasidade sira ba Maromak nia Reinu. Hodi agradese Na'i ba ninia konfiansa, ita kaer liman ba malu no ita hananu Maromak nia oan sira nia orasaun

Ami Aman

